

UCAPAN PERASMIAN

**PROF. DATUK DR. D KAMARUDIN D MUDIN
NAIB CANSELOR
UNIVERSITI MALAYSIA SABAH**

**MAJLIS MAKAN MALAM DAN PELANCARAN PROGRAM
BAHARU RADIO KAMPUS KITA FM
UNIVERSITI MALAYSIA SABAH (UMS)**

**21 DISEMBER 2017 (KHAMIS) | 7.00 MALAM
LIKAS SQUARE APARTMENTS HOTEL**

Bismillahir Rahmanir Rahim

Assalamualaikum warahmatullahi wabarakatuh
dan salam sejahtera.

Terima kasih pengacara majlis malam ini

Yang Berbahagia Prof. Dr. Ismail Ibrahim,
Dekan Fakulti Kemanusiaan, Seni dan Warisan

**Yang Berusaha Puan Malinaziah Datu Mohd
Julaspi,**
Pemangku Pengarah Penyiaran Sabah

Encik No'man Hj Ahmad,
Pendaftar UMS

Tn Hj. Zawawi Tiyunin
Timbalan Ketua Pustakawan Kanan

Timbalan-timbalan Dekan, Para Pensyarah,
Tenaga Pengajar dan staf pentadbiran Fakulti
Kemanusiaan, Seni dan Warisan, Sahabat-
sahabat Media UMS, Tuan-tuan dan puan-puan
yang dihormati sekalian.

Alhamdulillah, bersyukur ke hadrat Allah SWT kerana dengan limpah dan kurnia-Nya dapat kita bersama-sama meraikan **Majlis Makan Malam dan Pelancaran Program Baharu Radio Kampus Kita FM**, Universiti Malaysia Sabah. Saya amat berbesar hati berada bersama-sama hadirin semua dalam majlis yang penuh bermakna ini. Sesungguhnya, majlis seumpama ini dapat merapatkan lagi silaturahim antara kita terutamanya dengan pengamal media di Sabah dan antara kakitangan di jabatan masing-masing.

Saya selaku Naib Canselor secara peribadi ingin merakamkan penghargaan dan terima kasih kepada semua sahabat media yang telah banyak membuat liputan dan menyebar luas berita tentang UMS serta sentiasa menyokong acara-acara yang dianjurkan oleh UMS. Harapan saya agar hubungan baik yang sudah lama terjalin ini kekal berpanjangan.

Hadirlin hadirat yang dihormati,

Perkembangan radio kampus adalah suatu perkara yang lazim bagi universiti-universiti terkenal di luar negara.

Di UMS, radio kampus yang bernaung di bawah Radio Televisyen Malaysia (RTM) merupakan wadah kepada rancangan-rancangan kerajaan dan universiti supaya intipatinya dapat disalurkan kepada seluruh warga universiti dan masyarakat. Ia juga menyumbang kepada peningkatan pemahaman pembelajaran kepada pelajar apabila berdepan dengan peralatan canggih, didedahkan lagi dengan perkembangan terkini industri serta mempelajari teknik komunikasi yang baik sesuai dengan hala tuju universiti seiring dengan ledakan revolusi industri 4.0.

Memorandum Persefahaman atau MoU yang dijalankan antara UMS dengan RTM dilihat memberi impak yang besar kepada pelajar dan kakitangan kita dalam bidang penyiaran dan kewartawanan apabila kedua-dua organisasi menawarkan kepakaran masing-masing yang mencakupi bidang penyelidikan dan pembangunan, kemudahan komunikasi dan media, penerbitan dan siaran dan juga bidang teknikal sebagai manfaat bersama.

Saya berbangga dengan pencapaian Radio Kampus UMS yang telah melahirkan beberapa pelajar UMS menjadi personaliti tv dan radio di Malaysia. Antaranya ialah Safwan Sawi di TV3, Richard Chai di RTM, Nizhamul Hayat atau Nizz di KupikupiFM, Aeman Jauhari di Suria FM KL, Albert Thien di NTV7 sebelum melanjutkan pelajaran beliau dan Tan Shi Ai juga dengan NTV7 pada satu ketika dahulu.

Kampus Kita FM yang kini menjadi medan pengajaran dan pembelajaran bagi pelajar UMS juga bertujuan melatih pelajar supaya kreatif dalam menyampaikan informasi selain melatih pelajar berdepan dengan masyarakat. Ini selari dengan Lonjakan 1, Pelan Pembangunan Pendidikan Malaysia (Pendidikan Tinggi) 2015-2025 untuk memupuk dan membentuk graduan holistik, berciri keusahawanan dan seimbang.

Dengan paparan program baharu radio kampus UMS ini diharap akan menjadi lebih padat dan cenderung ke arah menyalurkan maklumat universiti kepada para pelajar dan masyarakat sekeliling. Disokong lagi dengan aplikasi baharu atau “mobile apps” maka akan memantapkan lagi siaran Kampus Kita FM.

Hadirin yang dihormati sekalian,

Saya berharap dengan kepakaran yang ada, radio kampus UMS akan terus melangkah ke hadapan, melahirkan graduan-graduan cemerlang dalam aspek penyiaran dan kewartawanan.

Dengan lafaz *Bismillahir Rahmanir Rahim*, saya melancarkan Program Baharu Radio Kampus Kita FM.

Sekian, terima kasih.